



皇清誥封光祿大夫項公墓道碑銘

賜進士出身

經筵講官文淵閣大學士兼禮部尚書

妻東王揆撰文

封光祿大夫頃君景原發聞於東南才與德兼為世所

取重年七十有三考終於家聞者咸悼之其子慄

切悲哀走使京師求為墓道之文乃稽狀所具撫

其大者以施諸碑維項之先出自姬周因封以為

氏至晉大司馬欽始遷漸之淳安迨唐清泰中名

紹者不就徵聘去淳安隱於歙南之小溪自是乃

為歙人支系蕃衍科第相仍歷宋元明以至於今

小溪之項聞天下傳君凡二十有四世矣君諱憲

景原其字王父德旻父時端葆光弗耀兩世皆有
厚德父初艱於嗣晚而生君絕憐愛之襁褓中即
異凡兒長老有識者皆許為大器年未弱冠即出
遊武林師宿儒張大聲與今大冢宰浩軒徐公為
同學為文搖筆立就驚其輩流業成而歸試輒在
前值家中落念兩親春秋高祿仕不可猝得謀養
為急乃之維揚用鹽筴治生家日以起兩親年皆
踰大耋婆婆娑令終凡所以頤養口體娛悅心志者
靡不至方營葬兆域未定父夜入夢自示其處遂
得吉窆人咸謂孝思所感東南煮海之利資以富
國雖有使者坐持其柄於上尤賴有老成人共幹

之君於其間為之眉目其才既什伯於衆心精而
智敏計熟而慮周每發一議衆皆悅服財不匱而
事以集蓋三十年間君之力為多歲癸未

翠華復南巡君為國之大計首衆而籌獨伏

清蹕之旁請貸內帑以暫紓轉輸之困

天恩大沛立賜俞允由是江淮改觀其事尤偉人知頌
焉維揚地當四衝冠蓋輪蹄南北如織君譽望日
著名卿碩士至止者多與定交若大司寇東海徐
公少宗伯平湖高公於君皆有國士之目君為人
敬宗睦族多致力於根本之圖嘗往來家山行求
先墓自始遷祖而下皆伐石樹碣繪以為圖傳之

永久宗祠創於曾王父厥費盈萬歷二十年而後成至君之身少就圯矣又地濱於河嘗苦水齧其址因築長隄護之撤舊易新豎緻有加其費視舊相埒復作新祠特祀其曾王父暨王父乘歲凶穀貴時爲之且爲德於鄉人祠成觀者感歎先世遺像散落及君之身勤求多年一朝獲之無不以爲異遠祖當南宋時有與紫陽朱子同第淳熙者舊讀書之堂朱子訪焉顏之曰三面滌溪以巖嶺之水滙斯地如璜璧也故址湮沒至君復之仍揭朱子所題於楣間所居之鄉環山瀕河石隄障之族處者千室或霖雨暴漲則廬舍有漂沒之虞君爲

增築數百丈水患可永除又倣范文正遺法勸置義田廣爲贍給於族之賢者或嚮學者則厚資之材而可任以事者多方成就之推亢宗之義施及外家於母黨妻黨用意尤篤衛其先塋而延其後嗣並昭然在人耳目諸如親賢取友教子範俗皆非近今人可及生平無他嗜好唯引觴琢句臨摹法書而已順治元年八月十六日生康熙五十五年閏三月初五日卒

誥封光祿大夫又贈其兩世考妣如其階子四綸內閣中書候補主事網延安府同知候補按察司副使育貢生高太學生孫男十五人曾孫男六人夫古

墓道碑銘
三
所謂不朽者三德則康世功則濟物皆取及人爲
義特出之輕重大小有不等耳君旣以才自見用
其緒餘以善其家而承其本宗雖未嘗有位於朝
然贊助公家多所擘畫使在上者收其功而已不
尸其名請帑之舉非得君毅然爲之在於他人必
將觀望震懾退避而不敢前乃一請而得

內府之金百萬俾國之大利源源而生不困不竭人藉
以蘇各懋其業其及於人者亦弘矣遠矣丙午秋
君之兄與予同舉於鄉緣是得與君相識嘗屢通
書疏致殷勤其後伯子在薇省每從容來見進止
謹重綽有家風間與之論文遠勝於儕輩仲子赴

選入都亦嘗謁予覘其丰裁可知材具之美乃皆
得前三年歸娛侍君之左右忽遭大故不以職任
有羈得親含殮亦可少釋人子之痛今者遠道緘
音皇皇然以圖不朽其親念君爲予故人亦安可
辭也旣爲之論著復綴以銘銘曰

大化甄陶莫窺其垠萬彙之生芸芸紛紛立夫兩
間所貴維人疇克副之有美如君白首無疵髻而
有聞負笈從師典籍是勤湖山之間樂彼同羣操
觚爲文含英吐芬少復需之致身青雲歛其才華
頰首爲親迺甘迺旨以朝以曛煮海熬波國之利
源轉運江淮歲千萬緡有君爲謀不病其貧爲時

墓道石金
四
蔡著必我咨詢

翠華南來清蹕無塵伏地叩呼草莽有云貸帑蠲徵荷
此殊恩

宸翰之昭天語之溫有祠煥然俎豆以陳有隄屹然室
廬以安田法高平倉困可分蹟復紫陽千年不湮
旣昌其家復耀其身友懷其信族保其仁望起鄉
邦名滿縉紳厚福所鍾今返其真蔚蔚振振垂裕
後昆銘以彰之琢此堅珉

山陰楊賓書丹 秣陵田林篆額

皇清誥封光祿大夫耐菴項公墓誌銘

昔曾子有云行己之志以約其親不孝之大者予
嘗誦其言爲之惕然晚近之士志於利祿爲干進
之文僥倖一遇而不可得則以困苦終其身不逮
事父母者無論矣其或需養至急乃不能具一日
之養徒使暮齒之親坐朝夕之累與田叟竈嫗同
其顛顛爲人子者奚堪自問乎即有軼俗之行然
動與世乖不能爲親少自抑損亦以困約其親自
成其傲僻故夫行己之志者不一類矣此非有大
不善也而昔賢之論乃若此則世之人亦未嘗聆
斯言而知自咎也吾故於項先生早歲之事歎之

躔之方其遊學武林有宿儒以爲之師得其指授
其文往往勝人足以芥拾科第顧兩尊人年高需
養遂棄去不復圖以治生爲事家因以起則迎兩
尊人客地備物致敬就養無方先後皆年踰大耄
康強令終享有人子奉養之樂而忘人間父母饔
飧臬纊之艱究之才達而行立貽其親以令名古
南陔白華之孝子道如是也可不謂賢乎先生諱
憲字景原別號耐菴世居歙南之小溪當唐清泰
中始祖諱紹者却徵聘由淳安而來遷代有聞人
縣於世牒宋淳熙中有諱牧者與晦菴朱子同第
其讀書之堂當滌溪之三面朱子所題之額猶世

守之累傳而至諱德旻者生二子長諱時端實生
先生其上望始遷之祖二十有四世矣自幼即知
勵學旣絕意干祿乃來維揚理鹽筴以佐公家俯
仰疾徐悉會其宜數十年間名滿江淮推爲長德
又能身任非常之請轉時困詘人蒙其施知其事
者皆能道之養親之外唯以祠墓爲重嘗往來家
山行求先墓自始遷而下皆繪爲圖伐石表之可
以千年不迷宗祠剏於曾大父歲久將圯虞水齧
其址先作長隄護之然後易舊以新費以萬計復
於其旁特作新祠祀曾大父大父報本之圖如是
其力他如增石隄以保室廬置義田以贍宗族凡

有關於先世及來禊者用心無弗周若其敦渭陽
之情延外舅之嗣又皆篤於人倫恩義而感德懷
賢不遺其故舊則不可以勝舉也雖家維揚絕遠
於華侈縱恣之習時多有起而復躡者常諄諄引
以爲家戒治事之暇未嘗廢卷冊坐而手一編即
欣然有得飲酒哦詩染翰臨書老而不知倦也其
生以順治元年八月十六日其卒以康熙五十五
年閏三月初五日享年七十有三元配王前卒繼
配羅皆有婦德以伯子貴

封內閣中書光祿大夫

贈其先人兩世如其階又

贈封其配皆夫人子四長綸內閣中書候補主事王出
次綱延安府同知候補按察司副使次育貢生次
高太學生女一適貢生程疏俱羅出孫十五人綸
出者七道昭蚤殤道昕道煦道昉道睽道曠道暉
綱出者二道暉道暖育出者五道暄道暄道晞道
暘道晰高出者一道晚孫女八人曾孫六人曾孫
女二人以

予舊識其伯子近復交其仲子屬爲
埋銘因不復辭先生生平雖多可述而於年之方
銳能自沒其所長舍已急親得曾子之意尤爲不
可及也銘曰

古之爲士養是急畊田學稼供子職雞豚畜牧釣
且弋親之所需虞匱缺五十始衰可衣帛老而食
肉輔羸瘠維親有子樂朝夕偃仰焉知有窮阨今
也爲儒守佔畢懦而不能事衣食養親之具百無
一生苦其親髮垂白盤饘甕糲禪有蝨挾其毛錐
期必得縱使得之親不及椎牛上塚復何益何況
終身困蓬蓽乾死書雖在空冊賢如斯人見之決
早棄虛名取長策子道克修親以悅食則兼珍坐
重席几杖從容察顏色三公不以易一日翁媪優
游踰大耋宗祠祖墓及廬室義田遺像兼往牒我
身圖之不遺力凡百所爲皆可則其聲洋洋出鄉

國有服煌煌被

恩澤歸全於天營此宅封之隆然非馬鬣鏡辭幽宮永
無泐

瀘州先著撰文

長洲顧藹書丹

秣陵田林

篆蓋

祭輓彙錄卷一

祭文

維

康熙五十有五年歲次丙申四月庚寅朔越祭日
 乙未 經筵講官文淵閣大學士兼禮部尚書加
 七級期王揆率男 日講官起居注詹事府掌詹
 事兼翰林院侍讀學士加二級奕清湖廣督理湖
 南糧儲驛鹽道按察司僉事加二級奕鴻謹以剛
 鬣柔毛庶饒束帛之儀致祭於

皇清諸封光祿大夫景原項老年臺之靈曰於戲智士
 峰頽賢人星隕西鄂芝枯南陽菊盡霜鐘歛以銷

聲綠琴吁其摧軫松喬之契方結修期濛汜之谷
俄悲急景猗歟項君焯矣令望系分姬牒派衍秦
鄣世有俊德載誕賢良千尋標舉萬頃汪洋君之
德器渾金璞玉君之容止鳳質龍章君之事親左
右無方君之交友芝蘭有芳謂余不敏蚤參時彥
憶覲賢昆同被鄉薦用是因依獲申繾綣山澤清
遊池臺曲宴詠白駒以繫維感浮雲之聚散君昔
棄舉遂事治生賜則億中回不違仁奉庭闈兮娛
愛日視富貴兮若遺塵雖謝推擇彌暢聲聞季將
軍之任俠百金一諾魯先生之高義排難解紛洎
余奉使持衡兩浙花明隋苑理棹南行月映清淮

脂車北發縱牽迫於嚴程亦從容於款接書畫訪
米家之船蘭菊尋羅含之宅自茲間阻綿歷春秋
寤寐之思常縈心曲寒暄之問無間置郵貽陳導
之尺牘長為藏弄玩大令之書法殊賞銀鈎布被
脫粟寧誚於故舊招賢開邸淡企夫嘉謀交淡四
紀宛焉如昨懷哉老友惟養德於木雞藉甚賢郎
有相輝之花萼余之掌銓軸也仲典方州來分竹
使之符余之居政府也伯登華選入直絲綸之閣
是皆奉訓於義方乃見服官之勤恪惟

聖治之廣孝用推恩於所親鸞鵲紫泥拜
誥封於一品芝英垂露降

睿翰於五雲人是耆英方開洛社年推更老將賁蒲輪
豈意祝鳩之日遽悲屬纊之辰守得庚申莫驗熊
經鳥息算來甲子僅符二首六身於戲項君爲時
所倚如日有圭如車有軌人之云亡天何以懟銘
其圓石非無蔡邕之詞書彼素旗亦有潘安之誄
余復何言乃敘交情一朝永訣終古吞聲些詞寄
奠絮酒遙傾冀明靈之如在庶少鑒夫哀忱於戲
哀哉尚

饗

維

康熙五十五年歲次丙申五月庚申朔日 經筵
講官內閣學士兼禮部侍郎年家眷弟彭始搏謹
以清酌庶饗之儀致祭於

皇清誥封光祿大夫內閣中書加十二級景翁項老年
臺之靈曰嗚呼哀哉大雅云亡風流歇絕芳草萋
萋春風嗚咽猗歟太翁盛德難窮生而岐嶷文陣
稱雄揚葩吐秀大夏鏞鐘小試冠軍江東獨霸數
厄劉蕢臨風叱咤猿臂難封蛾眉不嫁殖生端木
三徙陶朱丈夫遇合何必一途魚鹽海錯自有竒
書乃睠維揚山明水秀擇地居通轉輸輻輳消息

外傳彙錄卷一
三
盈虛千金數購輜軒使節側席咨諏畫沙聚米借
箸而籌經營齟政字字嘉猷

翠輦時巡花繁玉蕊

賜對高旻備詳素履如此遭逢人生有幾非惟
賜食亦且

賜書

天章雲漢寵并羣儒捧歸鄉里榮耀通都仲連解紛孝
先赴義任卹睦媿筆難悉記建祠睦族又其餘事
長君文彩球琳琅玕紫薇仙署芍藥雕闌義方貽
訓忠孝兩端次公倜儻邊庭司馬洵歷監司福星
中夏諸子翩翩溫文都雅晚年間曠詩酒陶情碑

摹蓋白帖寫黃庭新篇擲地作金石聲豈意春來
忽聞惡耗白玉樓成修文是悼朋好咨嗟神祇莫
禱溪毛采采束帛戔戔靈旂笑語髣髴生前來格
來歆降此几筵嗚呼哀哉尚

饗

維

康熙五十五年歲次丙申五月庚申朔越宜祀之
辰原任 經筵講官戶部尚書加七級纂修詩經
年家眷弟王鴻緒率男 欽差寶泉局監督戶部
山東清吏司郎中加一級圖煒謹以辦香束帛清
酌庶羞之儀致祭於

皇清誥封光祿大夫內閣中書加十二級景翁項老年
臺之靈曰嗚呼白嶽祥鍾黃山秀峙望族華腴實
惟項氏種德寬慈昔稱佛子傳至牧公肇登科第
列戟門闕鳴珂鄉里繼繼承承簪纓蔚起君甫垂
髻天資穎異素業詩書迴殊紈綺二酉窮探五車

博記豹霧方騰鵬雲乍試君獨油然孝思亶亶奉
養服勞高堂色喜詎屑因循雕蟲末技爰自歛南
遷於邗水齶策運籌熬波綜理洞悉盈虛熟知利
弊和易宅衷精勤任事使節遙臨羣相稱美商榷
諮諏待以殊禮深自撝謙益徵經濟入侍庭闈駢
羅甘旨揚顯靡涯孺慕終始篤念本源無忘積累
瑩域繕修宗祠飭庀塗墍聿新風雨攸蔽肯構肯
堂以續以似友愛睦婣行葦具邇顏訓柳箴義方
愷摯薛鳳聯翩荀龍俊偉橐筆西清紫薇月霽佐
郡延安榮遷旌棨並奮亨衢均膺膺仕壘荷

綸封輝煌誥紙環擁孫曾琪花韡韡備樂天倫永綏繁

社花塢藥欄筠窗棊几卷軸縱橫鼎彝列次名帖
手摹古琴興寄招鶴山中盟鷗澗涘陶冶性靈超
脫塵滓綠鬢朱顏松喬堪擬德幼年高期頤可致
忽訝蘭摧俄嗟芝瘁蓮界逍遙蓬壺遊戲緬憶光
儀追惟雅誼馨歆如存風流未墜耆碩云亡老成
長逝寥落晨星睠懷揮淚江樹微茫竹西迢遞遙
奠芳蘅愁杼短誄尚

饗

維

康熙五十五年歲在丙申仲夏月庚申朔越祭日
宜祀之辰 經筵講官工部尚書年家眷弟徐元
正謹以清酌庶饘之儀致祭於

皇清誥封光祿大夫內閣中書加十二級景翁項老先
生之靈曰余歷官於朝鞅掌風塵凡士之抱隱德
而不出者惟恐不能週知之然廣攬遐搜每樂從
而諮訪焉公才德茂著令譽颺揚自士大夫遠方
都人士無不交稱曰景原項先生者歛南望族天
性孝友言行動合矩度自少折節讀書以斯文相
砥鏃既長爲高堂奉養之謀精心計然之術維揚

籌運家業遂隆隆日起且胸中朗然無滯吝見機
獨明遇事能斷好施樂善孳孳常若不及以故四
方名流懷刺到門願得識面爲快一時當事亦款
洽論交相見歡如平素余聞而慕曰古所稱賢豪
間者殆其人歟嗣後長君視草薇省彩煥天衢仲
君佐治延安政聞皇路若叔若季聯鑣競爽膠序
馳聲而況蘭孫濟濟盈階觸目無非琳琅珠玉論
者觀厥所成每遡厥所自以公之受茲多祉皆公
所積者厚也於是公之名行因得盡所未聞余方
謂上壽可期長享五福之疇詎意月冷青蒿風寒
碧落哲人忽焉其云萎耶嗚呼痛哉元味希音川

流霧散仰天遙訴悽切增欷雖

綸章稠疊先後受封泉壤光榮奕世尤盛獨是老成摧
謝人士盡傷遙望雲車不能不進述其生平而深
爲惋惜也哀哉尚

饗

維

康熙五十五年歲次丙申四月庚寅朔越祭日壬辰
經筵講官禮部左侍郎兼翰林院學士加一級
年家眷弟王思軾暨男癸巳科舉人荃謹以剛鬣
柔毛香帛庶羞之儀致祭於

皇清誥封光祿大夫內閣中書加十二級景翁項先生
之靈曰嗚呼馳封而階極品眉壽而邁古稀列星
當厭世之天年乘雲適遊仙於化日此亦從來紀
載所鮮聞生人第祿之罕匹者矣然而老成凋謝
梁木斯傾賢豪淪喪遐邇怛怛胡百齡之未屆遽
長逝而辭榮豈其振羽翰於華表抑或芙蓉之舊

城雖復達人齊物太上忘情能弗結遙思於箕尾而等一視於殤彭斯則契友同然之感亦孝子莫解之誠朝士所以聆音而嗟悼邦人爲之聞訃而心驚也繫惟太翁之生平邁人羣而卓越紹祖武以繩其行孫謀而貽厥品概則璞玉渾金襟懷則光風霽月言規行矩而律度在身備物盡倫而孝友無缺更復好施樂善然諾不渝拯鄉鄰之急難如疾疢之切膚無沾沾之德色陋子子之鄙夫麥舟誼篤於知舊壺漿感被於僮奴四海名流懷刺而以識荆爲快一時碩彥論交而以投轄爲娛經濟合時宜則見機立中開陳諸利弊則當事造廬

此皆躬行之梗槩不殊稽古之鴻儒抑其大業所存尤在穀詒之教讀書以進取爲期居官惟克勤是効體立而後用行作忠無非移孝長君揮毫殿閣行看畫省含香仲君佐治延安竚見埋輪當道若叔季之馳譽膠庠自飛騰而立登清要凡皆仰遵於庭訓者深用以敦勉於立身之道也乃者駘背神清松齡養志崇封之偉望絕倫大隱之休聲特異三多屈華祝之年一品埒公僚之位養老尊賢之典父子錫以龍章勤家蓄德之籌孫曾集如鱗次桑梓有善人之稱縉紳仰通德之里太翁貴而益謙耄而彌恪已踰杖國之期應舉引年之爵

外車實錄卷一
僉云子姓之滿前洵為天倫之極樂何圖雪縞千
峰風悲萬壑方願擬夫岡陵遽上征乎寥廓軾忝
在通門熟聞芳躅嘆哲人之云亡慨少微之隕落
奠匪隻雞弔虛雙鶴牲祀未虔禮儀愧薄哀哉尚
饗

維

康熙五十有五年歲在丙申孟夏月庚寅朔越祭
日宜祀之辰 經筵講官禮部右侍郎兼翰林院
學士年家眷弟胡作梅謹以清酌庶饌之儀遙致
奠於

皇清誥封光祿大夫內閣中書加十二級景翁項老先
生之靈曰嗚呼少微星隕碩德銷沈滄海濤乾哲
人凋謝琴亡子敬悲大雅之長淪笛咽山陽悼典
型之已遠交親雪涕故舊傷心於惟先生閱閱名
家簪纓世胄慧心穎異夙探載籍之竒天性友于
早樹人倫之表歡生萊服庭闈之笑口恒開愛比

名軒集卷一
姜衮兄弟之孔懷既翕侍疾則衣常御體居喪而
水不沾脣加以霽月迎人弗爲崖岸和風扇物詎
設町畦期功彊近之親推恩不少輝庖翟闈之賤
待澤尤多而且蒿目時艱惕懷民瘼念枌榆而解
橐人無轉徙之勞爲桑梓而發困道鮮流離之苦
彥方在邑俗自化其紛爭萬石居鄉世共知其醇
謹躬行實踐既言有物而行有恒慎獨防微尤仰
不愧而俯不忤流光積厚實至名歸

天語爲之褒嘉當事亦皆延佇又况蘭芽挺秀玉樹齊
芬長君侍直鼇扉綜內外絲綸之職升華鳳掖冠
左右簪橐之流次君丹陛分符黃堂佐政聯熊軾

之崇班齊驅五馬展鴻猷於名郡行看九遷詩禮
既傳子還有子箕裘克紹孫復生孫固宜躬享五
福之疇遐齡永錫人進九如之頌上壽可期者矣
詎意鯉夢呈妖鵬鳴兆讖名香幾兩已無益壽之
方菊水一杯竟乏延年之術作梅夙仰高風久欽
懿行憶神交於曩昔方夢想於前期痛耆舊之云
亡班荆永已恨老成之不作掛劍無從悵望雲車
風馬之蹤曷解木壞山頽之憾生芻一束聊達哀
忱絮酒三尊尚祈來格嗚呼尚

饗

維

康熙五十有五年歲次丙申夏四月庚寅朔越十
五日甲辰之辰兵部左侍郎加三級李先復右侍
郎仍管光祿寺事田從典武選清吏司郎中加一
級談九叙車駕清吏司郎中加三級嚴昉武選清
吏司主事江為龍車駕清吏司主事加二級龍燦
職方清吏司主事加一級余慶祚武庫清吏司加
二級宋瑞司務廳司務加一級寇鱗分巡建昌上
南道四川按察使司僉事加二級汪錫齡謹以東
帛瓣香清酌庶饗之儀致祭於

皇清誥封光祿大夫內閣中書加十二級景翁項老先

生之靈而言曰嗚呼黃山鬱積練水澄清篤生賢
哲遐邇知名於惟公才子建八斗蓼莪棠棣張仲
孝友春秋享祀修祠設衣合族燕飲昭穆怡怡既
葺其祠復築石砌千室奠安洪波不入揚州佳麗
迎養高堂奉甘薦旨朝夕靡忘念切謀生鹽筴是
究弊剔利與中情迺欲出言人服豈曰同儕秉鈞
斥鹵置予於懷宣聖宮牆棟楹朽腐修理多金慨
然樂助商疲目擊疾首痛心陳情抗疏萬戶安寧
潛德幽光代累仁厚循例請封品膺上列龍駒競
爽二惠先鞭監司粉署借寇大賢賦性柔嘉雅尚
恬澹處已謙冲槩乎莫上賓朋滿座暢飲高歌山

隈水涘以遨以遊海內鉅公心焉允服反覆揄揚
聲稱已熟卜築於野基址仍先秀良有賴肄業是
前風範儀型謂宜永世夫何一朝溘然長逝峰催
山岳光掩星辰春罷相杵鶴唳亡群復等或託神
交或叨舊契瞻望南雲中心如醉有清者醕有踐
者邊溪毛蘋藻靈其鑒旃嗚呼尚

饗

維

康熙五十五年歲次丙申五月庚申朔越宜祀之
辰兵部左侍郎加三級李先復右侍郎仍管光祿
寺事田從典武選清吏司郎中加三級談九叙員
外李德絢主事江為龍車駕清吏司郎中嚴昉主
事龍燦職方清吏司郎李文鄰員外任中宜主事
余慶祚李其旋武庫清吏司郎中高浚主事宋瑞
司務廳司務寇鱗謹以香帛庶羞之儀致祭於
皇清誥封光祿大夫內閣中書加十二級景原項太翁
之靈曰嗚呼商嶺芝摧老成已落落社觴枯耆英
不作火冷丹泉雲頽翠嶽孝筭悲林哀鶻啼幙翳

惟太翁世瑞人英實生右族早飲香名襟期磊落
氣宇崢嶸臨風玉樹蹴海秋鯨孝悌之姿根於天
性入奉親歡出承師訓篤厚本支刑於家政待人
以寬持身以敬語其才學爛兮彩毫博聞強識倚
雅馭騷豈徒章句何必逢遭焦桐響遏璞玉光韜
託迹維揚挾持齟策利弊悉知是非獨決藻鑑如
神溫和可接不競不絀有恒有物名賢佩服當事
推崇冠蓋相望聲氣常通言皆合理動輒見功鬱
爲物表翕然人宗連舉大喪情文備極擗踊哀號
孝思維則獨致精誠勿形辭色百務聿興五禮咸
秩往來故里時省先塋豐碑屹立古木成陰宗祠

復整榱桷輪囷滌溪書屋締構重新嘉惠旁流仁
恩遍及初置義田廣爲贍給養老撫孤捨衣賑食
里黨鄉鄰靡不周恤爰鍾令子彩翮高騫錦衣拂
拂玉珮珊珊伯方結綬仲已彈冠花翻釵砌春滿
熊轡會遇

皇恩特膺異數一品榮封

九重眷顧鳳額龍綃珠珂玉樹國慶家榮兼收并至堂
開綠野莊築平泉行觴竹裏採藥山前良朋犀局
羣從朱絃固應却疾兼可長年何意永辭浮生易
了滄海濤橫玉京路杳壁掩青山塵埋粉旒孝子
悲傷親知痛悼先復等夙欽雅範久慕芳型哀躔

祭輿奠金卷一
星鶴淚切簪紳桑河水咽總帳燈昏難留仙枕徒
奠金門有蔬載奉有醑載酌萬感紛披深誠聊託
薤露空賡泉臺冥漠靈其有知來歆公爵嗚呼尚
饗

維

康熙五十五年歲次丙申五月庚申朔越宜祭之
辰原任順天府府尹屠沂翰林院侍講學士李紱
右春坊右贊善兼翰林院檢討王誥翰林院編修
宮鴻曆楊開沅繆沅翰林院檢討嚴思位馬益巡
視北城廣西道試監察御史范長發戶部雲南清
吏司郎中戴綸工部都水司郎中陸遐昌謹以清
酌庶饗之儀致祭於

皇清誥封光祿大夫景翁項太翁老先生之靈曰嗚呼
夫人之俯仰身世富貴壽考存順沒寧而無不足
之憾者天下有幾人哉惟翁少而穎悟長通經史

從遊武林名宿試輒冠軍青紫計可俯拾以奉養
高堂謝去帖括五十年來運籌決策早已列簪紳
奉朝請卓然負東南重望凡文章鉅公道經竹西
聞鼓吹莫不握手訂交結驪而去猶之過泗州者
不見劉器之以爲恨事也翁又能推有餘濟貧乏
齊國之士賴晏大夫以舉火者七十餘家彼鄭莊
之迎客陳遵之投轄無論已而又勅宗祠立家廟
以妥先靈建滌溪書院以處秀良置義田以贍貧
弱築石堤以捍水災繪先塋圖畫裝潢卷軸遍邀
名人題跋以志不朽凡所設施皆原本孝弟關係
人心風俗豈徒好行其德而已哉以是天啓後昆
并生賢哲長君擅譽東閣次君展驥西陲幼子皆
珠諸孫盡鳳門第之昌正未有艾

聖駕南巡獲覲

天顏頒賜

御書人生之榮可謂至矣而且春秋踰楚丘之歲同絳
縣之老豈不可含笑於九原耶夫齊家通於治國
修身之道可推以治天下翁之茂德誠能動物翁
之長才智足應務倘一旦立於朝廷之上則兵農
錢穀禮樂皆可坐言起行惜乎未能大遂其志也
夫人材難得得之矣而不得用於上稍有以展其
長不獲立功名以垂後世自古以來賢豪之不顯

於時者往往而有後之從而憑弔之或作為歌詩
唏噓感歎未嘗不為之太息也嗚呼哀哉尚
饗

維

康熙五十有五年歲次丙申夏四月庚寅朔越十
有三日巡撫安徽寧池太廬鳳滁和廣等處地方
提督軍務都察院右副都御史加三級紀錄十一
次眷侍生梁世勳特以剛鬣柔毛清酌庶羞之儀
致祭於

皇清誥封光祿大夫內閣中書加十二級景翁項老封
翁之靈而言曰嗚呼太翁產白岳兮雄才號江淮
兮領袖司汝南兮月旦作蕪城兮祭酒每左圖兮
右史亦光前兮裕後洵

盛世兮羽儀不媿遙遙兮華胄翁敦詩兮學禮長名重

兮雞壇念西山兮日薄治鹽筴兮承歡爰腰纏兮
跨鶴臨邛水兮盤桓法魯頓兮猗氏比郭縱兮邯
鄲旣英敏兮果決復躊躇兮中節名譽著兮賢豪
智慮周兮濬哲定大議子詳明釋大疑兮直捷
翠華南幸兮千艘龍鳳飛翔兮江濤高旻燈火兮長夜
竹西歌吹兮停橈

天顏有喜兮垂問六度均沾兮 恩膏微翁率先兮儲
傳減徵借帑兮空號翁孝友兮媻睦恤孤窮兮宗
族葺先塋兮樹碑碣築河堤兮建祠屋三面滌溪
兮肯堂蓮岩精舍兮課讀義田學校兮捐資親串
朋友兮加篤窮八澣兮六義每揮翰兮唵哦愛丹

青兮金石日考索兮摩挲李邕接席兮傾倒王翰
卜鄰兮相過蘭玉盈階兮芬芳外弼教兮內含香
餘子聯翩兮鵲起孫曾濟濟兮翱翔翁年始同兮
絳縣羅城陌上兮相望胡忽舉手兮謝世乘白雲
兮歸鄉 侍生 昔曾轉運兮茲土密邇朝夕兮笑語
東西南北兮星移長相思兮江之滸忽報訃音兮
維揚老成凋喪兮心悲傷總帳在望兮隔雲樹遣
一介兮奠椒漿神有知兮來格其鑒予兮水一方
嗚呼哀哉尚

饗

維

康熙五十五年歲次丙申孟夏月庚寅朔越宜祭
日原任都察院左僉都御史年家眷弟王材任謹
以清酌庶饗束帛之儀致祭於

皇清誥封光祿大夫內閣中書加十二級景翁項老年
臺之靈曰嗚呼翁以命世之雄才篤生之俊杰乃
不使之大經濟於廊廟而忽齋志以沒也粵稽行
略載考生平維翁新安望族奕葉簪纓秀鍾川岳
之竒生而岐嶷負姿穎悟爲文落筆千言每試輒
冠一軍使出其所學何難俯拾青紫而顧以高堂
奉養甘旨爲先故謝去帖括挾醯策而經理於兩

淮維揚間運籌區畫每一發議輒洞中肯綮且英
敏果敢遇事能任故一時名公巨卿無不爭相推
重折節願交即齏運兩臺凡視事者亦必爰諮爰
諏因革咸當會

聖駕南巡洞悉商困疊沛

殊恩商業寔有起色凡此者皆翁老成練達具本叩陳
之所致也因而獲覲

天顏頒賜

御書克食等物嗚呼翁之榮遇若此夫豈他人所能幾
及也哉翁自綱紀兩淮時歷今五十年矣其間有
補於齏政者知無不言言無不當而又謙抑爲懷

不自矜伐然其才猷所至無不服其經濟也更篤
意本源修建宗祠敦厚族黨友于兄弟置義田築
石堤資膏火稅廣廈比比皆是也他若交友以誠
遇衆以寬慷慨直諒排難解紛以至困則周之危
則拯之種種懿行未易枚舉而且自甘朴素生平
無他嗜惟好古人法書兼留心詩律暇則臨撫累
日大小行楷酷似蘇米有得片紙者相與寶重嗚
呼翁之盛德如是才華如是奈何養望林泉而不
一施澤於蒼赤也耶雖然翁舉丈夫子四人長君
秩居薇省待銓粉署仲君延安分刺憲副將膺叔
則明經高第季亦國學蜚聲行將光大前業共履

朝端以竟翁未竟之施者亦大有在也又况孫曾
繼起濟濟英多咸爲玉樹琳琅翩翩國器者乎方
謂鳩杖却扶優游難老奈何甫逾古稀遂飄然長
逝耶所可爲翁慰者謂以七十餘年享茲全福榮
封一品

聖眷優隆固已全受全歸翛然物外矣而獨是老成凋
謝典型云亡凡屬知交莫不哀痛而况材任以世
講之誼有不爲之扼腕而悽惻者乎敬陳詞而奠
俎望來格以來歆尚

饗

維

康熙五十五年歲次丙申五月庚申朔越宜祀之
辰大理寺少卿吳梁通政司右參議張世琪江西
道監察御史陶彞掌河南道事福建道監察御史
鄒汝魯掌山東道事雲南道監察御史許惟模協
理河南道事四川道監察御史楊汝穀稽察錢局
福建道監察御史任奕鑿巡視東城湖廣道監察
御史黃叔璥原任江南蘇州府知府陳鵬年督理
通州坐糧廳工部營繕司郎中江藻掌山西道事
貴州道監察御史吳蔚起謹以香楮束帛之儀致
祭於

皇清誥封光祿大夫內閣中書加十二級景翁項太老
 先生之靈曰嗚呼清門遠蔭孝緒遐昌歙州文獻
 淮甸珪璋星為北斗日在東方人欽德劬世祝齡
 長玉棺遽下金刀失芒咸悲碩果徒仰靈光嗟維
 我翁家瑞國良柔嘉維則視履考祥龍身虎氣玉
 質金相忠甲信胄筆陣詞銜學尊圭臬韻叶宮商
 風雲結字錦繡成行出而小試動罔不臧笑彼燕
 雀詎識鸞鳳計然海上賈生洛陽聊抒經濟立布
 紀綱績成山海澤沛井疆策陳
 帷殿聲動巖廊九章紫綬上秩雲纒
 恩榮三葉泉壤輝煌翁兼百行首悖五常哀封塚樹義

置田莊譜聯瓜瓞祭備蒸嘗水源木本春露秋霜
 孝思罔極孺慕難忘餐分玉粒隄築虹梁千秋繪
 像百世承芳滌溪三面其流湯湯考亭訪舊講學
 有堂一朝新之遺墨馨香書聲溪響晨夕鏗鏘仁
 孝之後必有積慶田荆茂圃却桂連岡閣東視草
 陝北留棠熊轡治行鳳沼文章庭盈綵袖座擁羅
 囊素儒清德其興未央方期上壽永歷長桑何圖
 鶴馭遄徂雲鄉梁等世好聞訃情愴黃山黯淡邗
 水淒涼燕吳遠奠盡此清觴尚

饗

維

康熙五十五年歲次丙申四月庚寅朔越七日丙申宜祭之辰 欽命督理蘇州織造大理寺卿加六級年家眷弟李煦謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁之靈曰昔余在京邸稔知長淮為財賦名區鹽筴甲於天下而山川鍾毓名流碩士號稱淵藪是以每督漕使君返旆咨諏風土之餘即訪其間賢豪長者諸使君交口稱道咸屈指翁有國士之風時余貯之甯中憾未能見也繼奉

簡命巡視兩淮與銀臺曹公後先承乏者凡十年乃獲
日與翁相浹洽老成持重明達周通錚錚然足當
空群之目始信疇昔諸君子推重誠不虛而余浚
以識翁為快也夫筦吏治之責者類不能恃一己
之耳目以集事咨訪商度必賴有高明練達者以
相助為理余以謏陋之才久歷齟政釐奸興利蘇
困革繁諸所建立可久可大瀕年以來商困寢蘇
而余庶得藉手告無負於

聖天子簡畀之至意此雖使之者矢慎矢公其中規畫
指陳劬勩擘畫翁寔大有佐焉矧翁之為人卓犖
不羈倜儻不群篤於宗黨厚於友朋慎取予重然
而已也假令以翁之才上受

諾封鯁訓後投轄款賓旁及詩古文詞莫不窺作
者堂奧蓋余之與翁契者固不獨公務之相引重
而已也假令以翁之才上受
主知躬膺劇任庶幾乎陳孺子之宰天下其視凡上者
夫何殊而惜乎其未遇也然翁以緒餘小試於齟
筴之間而以其蘊蓄者翼我後人將來諸令嗣位
益崇責益重奉所訓而恢廓焉行見功業文章銘
旂常而垂金石則翁之才雖未盡展於其身必大
顯於其後也翁亦可含笑於九京矣然則余之唏
噓咨嗟不能無太息於翁之生平者不反有愧於
太上之忘情也耶臨風醜酒幸無吐諸尚

饗

祭輓彙錄卷一

祭輓彙錄卷二

祭文

維

康熙五十五年歲次丙申孟秋宜祀之辰 賜進士出身 內廷供奉翰林院編修前翰林院庶吉士年家眷世弟高興謹以瓣香束帛清酌庶品之儀致祭於

皇清誥封光祿大夫內閣中書加十二級景翁項老先生老世臺之靈曰嗚呼鄧林之木高必干雲渥注之馬良必空群喆人之生負才軼俗為幹於家為楨於國方其生也依之毗之及其歿也誅之悲之

惟我景翁生而穎敏博學嗜古言標行準一麾時
學經術經世端木之賢貨殖是務富海之舉其大
維齟吏而商也法敝則那君起廓清主者束手畫
諾而已罔敢掣肘緇紀兩淮歷五十年塞其弊孔
濬其利源管子之才劉晏之法斟酌變化牢盆踴
躍公則人服廉則無私銀臺廷尉賓禮榮施

聖主南巡洞悉商困免羸汰加殊恩疊晉皆君主持同

輩共欽獲覲

天顏咫尺德音頒賜

御書煌煌曠典有功不矜撝謙是踐君之懿行不可枚
舉臚其大者風茲寰宇備物養志孝於二人生事

葬祭誠敬必伸古不修墓君則曰否岡碑阡碣捍
崩樹朽奕奕寢廟高曾創之歲久傾漉輪奐重施
追封上祀

贈階一品異數殊榮千秋不泯既敬所尊必愛所親歲
時合饗利我後人鄉黨周問好行其德救荒贍傭
汎舟平糴族之貧寒養以義田餼廩膏火俊髦聿
先所居之鄉瀕河環嶂聚族於斯石隄是障淫雨
聚潦廬舍幾漂捐金增築鄭白功高舊戚外姻皇
皇周恤哀寡撫孤不遺餘力郡學傾圮俎豆無光
慨然經始鐘鼓鏘鏘別業滌溪五世之澤出諸荆
榛翬飛矢棘光前追遠裕後詒謀義方訓子德進

業修紅藥之廬祕省之書揮毫視草鮑謝馳驅

貶封三世

鸞書疊賁疇則能然燕翼所致君性卓犖君才健雄臨池弄墨騷雅宗工言論吐屬蘊釀經史身隱焉文高致然耳君好結客挈阮攜嵇唯先君子縞帶相知下榻蕪城悠然觴咏載酒題花笛聲三弄嗚呼哲人一萎孰不興悲况予交好其能恻而賦此些詞遙將絮炙執紼未遑藉陳哀臆嗚呼靈其顧余卒爵油然瑤池蓬島仙珮珊珊尚

饗

維

康熙五十五年歲次丙申夏四月庚寅朔越祭日宜祀之辰 武英殿纂修原任 南書房供奉翰林院編修加一級年家眷弟汪灝掌山西道事貴州道監察御史加九級年家眷侍生吳蔚起翰林院編修年家眷同學姪吳襄蔣繼軾翰林院編修加一級年家眷姪方覲候補守道參議加二級年家眷侍生汪升英原任浙江分守金衢嚴道年家姻晚生程鑾刑部福建清吏司郎中孫蘭苾候補主政年姻家姪程峯奉天寧遠州知州年家姻晚生程哲癸巳科進士候補內閣中書年家眷同學

姪曹志宏等謹以瓣香束帛之儀致祭於

皇清誥封光祿大夫內閣中書舍人加十二級景翁項
太翁先生之靈而言曰嗚呼黃山白嶽毓秀延芳
元精降祉德宿垂芒篤生令哲邦家之光小溪衍
派源遠流長公際景運天挺賢良文能舉秀器善
含章霞襟高朗海度汪洋擔囊負笈問業錢塘九
經七略三篋十行入程朱室登韓蘇堂文瀾綺合
筆陣雲翔當其得意不倚門牆壯焉挾策遊於維
揚烈比管晏術陋孔桑策數燭照洞中微茫縱橫
莫測吐納難量淵涵岳聳玉質金相心同鏡皎行
擬珪方度支轉運咸藉勛勩

翠華臨幸沛澤吳疆公伏而奏愷切周詳

天恩汪濊立起瘡瘡公之大節惇篤彝常孝思罔極秋
露春霜建祠封墓永奉蒸嘗置田修譜遠庇宗祊
金堤虹偃障以隄防玉粒山積濟以糗糧室旣安
堵歲亦無荒興宗睦族懿美堪颺其尤著者功及
紫陽滌溪三面纓帶如璜新堂翼翼掩映溪旁儒
風丕振先澤斯彰考亭遺墨千載猶香天之報德
世緒輝煌長君學富綸閣趨蹌擣辭鳩鵲視草鳳
凰次君才雋績婉龔黃案無卷牘庭絕桁楊叔季
鴻翥孫曾龍驤一門競爽五世其昌嗚呼封馳泉
壤秩晉巖廊家盈鍾鼎階列琳瑯生榮已備沒亦

奚傷嗟維灝輩梓里榆鄉老成遽謝嫩行難忘吳
雲渺渺淮水湯湯素旂製誅杼寫悽愴生芻一束
遙侑椒漿尚

饗

維

康熙五十五年歲次丙申夏四月庚寅朔越祭日
壬辰年家眷弟王復衡王式丹湯彭年魯衷淑王
誥李同聲王維翰李天祥李夢昂卞咸和陸應幾
李天祐吳國士樊經年家眷侍生吳蔚起唐紹祖
王履仁蔣繼軾年家眷同學姪程夢星方觀年家
眷晚生郭鋹汪誠郭彭齡郭嗣齡許迎年高克暮
唐繹祖方天育戴思謙蔣繼修吳公淳湯啓聲楊
夢琰王貽穀高元崑朱天澤許遯中謝遵王謹以
辨香束帛清酌庶品之儀致祭於

皇清誥封光祿大夫內閣中書加十二級景翁項老年

翁之靈曰嗚呼太翁之逝也誠人所不及料者矣
衡等忝太翁交匪朝伊夕見其體素豐健精神強
旺而且徵之素行之優居心之厚以爲耄耋期頤
可以坐致而不謂其一疾不起耶嗚呼翁世居歙
之小溪自唐以迄於茲周楚相繼其先世文人哲
士魏科高甲指不勝屈迨至太翁少負穎異姿工
舉業試每奪幟置青雲何難緣供養遂廢存大志
於衷弗瑣瑣研墨出交廣陵以籌算爲切務殆亦
昔者五湖之風歟後漸恢擴日隆隆起業鹺事爲
領袖焉

萬乘南巡獲邀

寵眷賜之

宸翰以及上方珍品優渥甚矣非太翁之賢聲素達
宸聰曷以致此太翁性至孝承顏順意於生前送死盡
哀於身後子職宜供罔不中禮先世祠墓頽圯不
治人方諉爲宗黨公事不需一人爲而太翁獨毅
然任之美其輪奐崇其壙樹至再至三觀瞻頓改
先世遺像越數百年杳不可追太翁不惜重貲相
購得而後安其惓惓宗祖類如此至於爲本族貧
乏計效文正之遺風置田以慮久遠俾無失所族
人有瀕水宅者水漲最苦賴有石隄以藩之乃爲
暴雨所傾幾無生矣太翁知之急命修築且增鞏

固絕崩患於是克安生全者其有量耶令嗣世兄
聲振藝林或騰躍

禁垣或出守要地文章政治鄉里

朝宁極口推仰皆以太翁年高給假歸養太翁可謂有
子矣而且孫曾林立蘭蕙盈階

鸞誥疊膺年登上壽太翁亦可以不憾獨是衡等或列
葭莩或叨契好方謂耆年碩德可以長奉典型而
不料其無生頓悟即成永訣能不淚涔涔下耶茲
以不文之言聊當述德之誄薄莫是將翼神來格
嗚呼尚
饗

維

康熙五十五年丙申之春友人翰林院庶吉士徐
駿謹以香楮尊酒致祭於

皇清誥封光祿大夫內閣中書耐菴項先生之靈曰死
生之理達人遐思如晝斯夜如往斯歸先生神明
委蛻雲湄一別千古吾心愴悲丁吾之世素業零
替卅角麤衰羈孤天地激揚弓裘離而幼志側聞
讜言乃在弱歲困予北征裘褐單弊朔雲飄飄將
涉汶濟身病綿頓心怯勞勩逡巡不前岐路隕涕
先生之仁重茵車毳輔以良藥丹參紫桂志愉氣
充勝此迢遞先公好士黠者反噬稚子出門先生

是賴嗟命之窮旁皇南宮騎驢嘯詠下第春風成
龍被黜貫蝨難工廣陵沽酒談笑從容忘憂解愠
拂拭之功麻衣席帽交道有終往歲仲夏同傾觴
竚盛顏朱暉清詩河瀉告母未葬歡笑何暇假貸
兼金片帆疾下乃營堂封松柏蔭藉施德於人不
作穀價兒女何知誦言早夜士輕貨賤恩意勿諉
激昂報德俯慙廢人何圖不弔遂離形神聞先生
疴夢寐如親奪我賢友號叫寢門先生眉壽子孫
孝友此曰考終報善良厚捧奠欵噓傷割在余儀
型日遠三復故書上言起居下發顛愚今日叩闥
吾何聊乎先生門族家乘脩錄先生純德表碣遠

矚獨敘交情放筆一哭靈帷有知歎我心曲嗚呼
哀哉尚

饗

維

康熙歲次丙申孟夏宜祭日管理鼓廳刑科掌印
給事中錢以埏禮科掌印給事中郭徽祚工科掌
印給事中詹嗣祿吏科掌印給事中阮應商稽察
錢局兵科給事中楊存理吏科給事中張王典提
督山東學政禮科給事中陳沂震工科給事中方
文瑞戶科給事中唐執玉謹以清酌不腆之儀致
祭於

皇清誥封光祿大夫內閣中書加十二級景翁項老先
生之靈曰嗚呼泰岱煙沈玉溪雲掩麟亡星落龍
躍劍飛嗟典則之無從興悲綠竹悵儀型之永墜

號泣鳴泉翼來歆於薄醊爭結想夫清輝維公星
象降精山川鍾美簪纓名閱冠裳表南國之雄金
玉英標蘭桂著東都之秀神襟凝遠德宇深宏挹
霞披而璀璨肅又為光注淵抱而冲融淳怡宅度
蹈中庸之為德無非規矩準繩本義方以貽謀悉
是詩書禮樂青藜夜叩編成天祿鴻章石室朝披
著就蘭臺令選五花判字溯家學之源流一札成
文推既勤之樸斲若夫窺雋異於天生聯翩起舞
振箕裘於世業磊落英多森森繞膝之珠砌砌盈
牀之笏蒼松翠柏人世荷以堅貞周鼎夏瑚奕禩
奉為珍什克庭

鸞誥羣知寵自天來積軸紫煙詎識福由德至洵屬一
時之偉範實為

盛世之休嘉也夫何孝養方隆快歡騰於舞鳳壽星忽
隕慘血灑夫啼烏天不憖留人將安仰塏等意想
雲樹正望斗以非遙聞罷舂相歎騎箕而何蚤仿
古昔之禴祭聊具一樽託方寸之微忱寄將千里
神如來格庶其鑒茲尚

饗

維

康熙五十五年歲次丙申四月庚寅朔越初三日
宜祀之辰 誥封中大夫戶部山西清吏司郎中
加三級年家眷弟吳從殷偕男掌山西道事貴州
道監察御史加九級年家眷侍生蔚起孫辛卯科
舉人候補內閣中書年家眷晚生安國謹以瓣香
束帛清酌庶饁之儀致祭於

皇清誥封光祿大夫景翁項老年親臺之靈而言曰嗚
呼龍馬海鶴天上星精商山洛社間世耆英胡天
不惠木壞峰傾聞者見者駭矚傷心翁生岐嶷鍾
靈白嶽鸞停鵠峙卜乎總角夙慧天成拔萃同學

揮毫落紙不假雕琢以翁之才何往不利挾藻敷
華取之若寄顧以迎養為甘旨地挾策廣陵帖括
遂棄天誘其衷家道豐隆宮錦萊衣洩洩融融椿
萱繼逝慎始慎終因夢卜吉孝感蒼穹翁有智勇
遇事敢為淮海南北美譽攸歸文采煥發靡不瞻
依名公鉅卿亦莫之違運籌齟政較若畫一當事
諮諏條理畢悉釐剔利弊曾通

警蹕

御書光榮克食下及千載盛事躬親逢之非大經濟曷
克如斯謙謙君子不伐不施老成碩望舍翁其誰
尤篤本原先塋是葺往來故山搜訪遺跡伐石樹

碣繪圖什襲繕完家廟經營竭力堤濱大河衝突
可畏鳩工庀材不惜過費及臻厥成乃塗乃暨作
我新宇雲蒸霞蔚兩世潛德積而未彰

贈階極品泉壤用光春秋薦享孝思洋洋即藉興祠拯
饑救荒邦人德之至今未忘紫陽朱子與翁先世
宋淳熙間同登進士三面滌溪讀書所憩朱子顏
額歷久已敝有宮詹公堂名德聚恰當滌溪三面
皆具翁重購還棟宇森布仍朱子語楣間高樹族
有秀良講習其中六百餘年覩先世風一堂友愛
初無異同教誨飲食共荷帡幪翁崇聖哲培植宮
牆首倡捐金丹堊輝煌學山雲起筆海波長青青

子衿甲第聯芳又置義田任卹貧寒廣為贍給舉族皆安每當省試大厦盤餐供其所需俾無艱難其受賜者戴翁之德間有不肖沒身臧獲捐錙贖歸資其衣食號曰仁人可無愧色翁築長堤水不為災族人千室夢穩顏開其於外家因此類推歲時伏臘相與銜杯延人宗祀完人婚姻排人紛難濟人困貧事無鉅細慷慨指陳懷其惠者挾纊飲醇忠恕持已和平御物德不望報怨不拂拂樸訥則喜華囂則艷閱世多年皤然老佛性無他嗜惟嗜法書大小行楷酷類米蘇揚風扞雅秀宕蕭疎蘊釀經史卷舒自如余與翁交可稱老友每一過

從兵棋陣酒中夜論文左宜右有胸襟灑落真堪不朽余移白下未經十載江上帆來首訊丰采拄杖看山方期有待胡為羽化桑田滄海翁之長年不藉藥石導養真氣精神內積一旦謝去世事如擲蓬瀛三島逍遙自適子子孫孫振振繩繩炳炳鱗鱗奕奕蒸蒸

熙朝鼎盛世股肱方來未艾如日之升書言五福翁膺其全如龍老子陸地神仙丹臺藥竈跨鶴雲煙生芻一束薦奠高賢其人如玉降我清筵嗚呼尚饗

維

康熙五十五年歲次丙申夏四月庚寅朔越祭日
巡按兩淮鹽漕監察御史年家侍生李陳常謹以
清酌庶饗之儀致祭於

皇清誥封光祿大夫內閣中書加十二級景原項公之
靈曰嗚呼不朽有三德為最上嚮用者五命曰考
終樹本恒春觸寒飈而竟萎砂能却老飛烈燄以
無功白華之什方賡玉魚之符忽下此淮山雲散
空傳大隱之招而洛社圖殘頓絕耆英之會也溯
自姬宗旋推甲姓晉欽公之勲望何減陶公唐少
尉之詩名超於少尹滌溪獨秀聯花榜於紫陽瑞

澤爲霖表松銘於石室千章喬木代擢珠珂五色
甘瓜脈綿丹雘是以應期而出少即騰聲更事旣
多晚尤進德達人後宜作誄以告哀君子表微
實更僕而難數夫澤潤江河由源迄委露穠桃李
自葉流根百行惟孝爲先四德以仁居首敬宗合
族范希文之志堪師信友恤孤山巨源之度本勝
見亦罕矣亶其然乎而乃色養晨昏眉齊大耄心
悲風木夢啓佳城紹先澤於百年宗祠再建保族
人之千室石埭增修加以汜毓門風兒無常父子
寬家法嫁不失時諾取信於友朋約弗苛於僮僕
由其德厚故爾才長成竹在胸小試計然之策亂
荷香誥紫泥之寵生逢

聖代霑

御書克食之榮而且庭際多蘭膝前皆鳳宮池紆珮
雅望於元輝邊徼題輿振芳聲於仲舉蓀枝玉立
盡日點頭椿質冰連隨時行樂擘紅桃之箋紙愛
倣蘇書颺青鴿之爐煙閒評水品尚臨風而却杖
每坐月以敲詩凡屬休徵皆緣靜勝詎意古稀介
壽乍展三齡乃至寒食消煙遽成長別天人響應

祭軒輿錄卷三
不無疑信之懷利弊咨諏如失左右之手嗟夫漆
燈黯黯徹夜無花丹旄飄飄浮生若夢春光過眼
一分不到白楊曙色滿空寸晷難賒地底轉歎蓬
山縹緲何來王子飛鳧佇期華表嶙峋重見丁公
化鶴嗚呼哀哉尚
饗

維

康熙五十五年歲次丙申四月庚寅朔越三日壬
辰宜祭之辰戶部雲南清吏司員外郎加三級今
在制年家眷晚生汪天與偕男太學生期鴻儒歲
貢生期漢倬謹以瓣香束帛清酌庶饗之儀致祭
於

皇清誥封光祿大夫內閣中書加十二級景翁項老年
太翁先生之靈而言曰嗚呼人之生世百歲維艱
惟賢與智天意所關鴻才間出宜壽如山以滋百
福以徵九還遐齡無旣俾享衆康行無不嘉動輒
得臧德與年俱遠而益芳堪同松柏豈比閨楊算

逾古稀已稱難老况有後賢濟濟不少簪纓顯揚
天其佑保溘焉而逝哲人云杳於惟我翁吾鄉世
胄正學名家水浮清淑山鬱精華祖功聿茂孫謀
更嘉緒傳累葉無枝不花懋遷江淮實善經畫弘
猷莫京廣譽攸屬名公鉅卿越南距北面覲神交
誼罔弗篤敦族睦媵捐金贈人急難克救積券能
焚美稱鄉黨孝弟情深德施遐邇意氣獨真

天顏指顧

宸翰遙頒嗟使諸公折節往還名論卓識為時敦崇繕
謀偉略通藝惠工高懷雅趣旁溢詩書文場旌幟
字品璣珠晚歲強健家聲裕美長君文章絲綸閣

靜次君經濟佐理劇郡濟濟孫枝蘭芳玉映得享
遐年何忽星沈峩峩崗嶺失此喬林春風雖暖恍
覺秋侵與忝夙好勒此微情在公盛德大業隆隆
光前裕後

封誥重重華袞增輝食報攸榮總帷飄搖瓣香憑依芹
葵之忱聊鳴吾私遙遙仙馭為我來思嗚呼尚
饗

維

康熙五十五年歲次丙申五月庚申朔越宜祀之
辰年家眷寅姪戶部廣西司主事王允晉禮部主
客司主事盧鴻熹刑部陝西司郎中施燾貴州司
員外郎王鳳孫工部虞衡司郎中胡忠本主事倪
璠眷晚生張崇禮眷寅姪內閣中書舍人掌典籍
事成說樊致一中書舍人多時珍鄧廷詰何繼曾
陳時夏楊若楸竇容恂林佶卜兆龍卜俊民韓暎
謹以清酌庶羞之儀致祭於

皇清誥封光祿大夫內閣中書加十二級景原太翁老
先生之靈曰嗚呼瑰異之材以用見長特達之器

弗用亦彰存乎其人不在所將繫光祿公才高質
良鍾歆之秀為項之光隱於齷筴顯於維揚孝友
任卹禮讓慈祥終身力行不怠益強門內修飭化
行於鄉建祠妥像禴祀蒸嘗義田廣置金隄樹防
凡義之施為善之量萬金為少三族胥匡以次而
推思廣德洋人倫儀表公宗碩望敦人是紀立義
為綱熬汲之衆賴公不彊持斧之使藉公以襄會
駕南巡駐蹕蜀岡公領羣彥起居

帝旁

天顏顧喜恤其疲傷

賜書

賜食曠典非常公感

皇恩欲報靡將訓厥賢嗣宣力為郎典書祕省簪筆巖
廊文舉蔚起歸美義方覘門必大卜世其昌公之
食德第祿未央奚期視疾遽萎於牀訃聞遠邇莫
不悽惶以公建豎有踰班行行人所難慨當以慷
惠先宗戚普及維桑恩全知好下逮獲臧水木叢
塚鄉塾書堂庇容廣廈濟涉舟航稱心傾橐平物
資糧待以舉火衆皆忘亡江淮瀰瀰睦歛蒼蒼久
傾令德欲沐殊芳幸與令嗣寮案頡頏紅藥共賦
丹陛同蹌甫申華祝忽接訃章歎深殄瘁思結蒼
茫用陳哀誄致薦馨香載奠絮酒遙致悲涼公靈
常存來格來嘗嗚呼哀哉尚

饗

維

康熙五十五年歲次丙申五月庚申朔越宜祀之
辰年家眷寅姪內閣中書舍人掌典籍事加一級
樊致一率男晚學生樊聖本樊後知樊翰謹以辦
香束帛之儀致祭於

皇清誥封光祿大夫內閣中書加十二級景原項太老
先生之靈曰嗚呼遡德門之世美兮於周室而發
祥洎淳安而寢大兮至歙南乃益昌惟光祿公之
誕降兮器早卜爲珪璋勤三餘其匪懈兮飽五車
猶未央謂青雲其立致兮乃愛日而弗遑效計然
之善術兮挾齏筴於維揚展孝思之不匱兮得就

養以無方人倫奉爲標準兮當事見而欽莊值
鑾輿之南幸兮沛澌澤於通商首同儕而虎拜兮獨上

接乎

龍光奉

御書之炳煥兮沐曠典之輝煌發兩世之潛德兮膺
鳳誥於天閭舊祠與新祠干雲霄而並峙兮先塋共古
像揭日月而彌彰復紫陽之遺跡兮倣文正之徽
芳旣深情於本族兮復篤志於涇陽待人則雍容
而爾雅兮論事則切直而慨慷志不求乎安飽兮
力惟肆乎縹緗行楷攬蘇米之袂兮聲律登李杜
之堂勵素絲以勗後嗣兮俾努力爲忠良或居清

切之地兮或佐衝劇之鄉咸龍驤而鳳翥兮作王
室之棟梁洵善人之有後兮卜壽考之無疆胡梁
木之遽壞兮痛典型之云亡嗚呼公雖沒兮道彌
長德之盛兮報難量桂馨蘭馥兮躋躋踰踰後先
輝映兮次第焚黃致一忝鳳池之末吏兮偕令子
以翱翔聞騎鶴而不返兮心悼痛而旁皇敬陳芻
而設奠兮遙寄輓於誄章冀公靈之不昧兮庶歆
享而來嘗嗚呼哀哉尚

饗

維

康熙五十五年歲在丙申十月丁亥朔日宜祭之
辰內閣票簽中書年家眷晚生鐵柱謹以剛鬣柔
毛清酌庶羞之儀致祭於

皇清誥封光祿大夫內閣中書加十二級景翁項太老
先生之靈曰嗚呼太老先生去世將周八月晚忝
通門世好迄今日始得瞻拜尊靈一展生芻之敬
其弔也固已晚然鄙懷有欲致有愈久而愈難忘
者不能不揮涕一言也晚與經士大賢嗣薇省寅
恭再歷寒暑初視其丰神駿爽議論沉雄動靜舉
止悉中矩矧胸次包羅經史有上下古今之識為

文千言立就如颺發泉湧汨汨其不窮晚心異其
蘊蓄弘深謂淵源必有所自及久與盤桓乃知家
學丕承有素得於趨庭之訓者不禁悠然神往欲
置身於太老先生之側親炙其行事語言為世標
準詩有曰高山仰止景行行止雖不能至心嚮往
之矣癸巳八月為太老先生懸弧杖國之秋經士
兄預戒行李歸舞斑衣臨別設祖輒詢太老先生
起居何狀稔悉其耳目視聽飲食寢興猶與少壯
無殊竊幸彭齡易致昉壽可期瞻顏行有日矣孰
意今年入夏遽以訃音相報耶倉皇驚愕之餘深
恨一見無緣且愧匏繫京塵難申椒奠適奉

旨鞠獄南畿星馳就道言念數歲神交將假
九重詔命一致悃忱此際機緣良非偶也特以時迫嚴
程不敢後公而先私而心神飛越悚懼靡寧今公
事告竣行且竭蹶還

朝始得迂途親奠少布哀忱至太老先生生平善行慮
知焉弗詳闡揚莫罄謹以所見所聞於經士兄者
為之誄曰相彼喬林厥蘂維梓茂植輪囷棟窿伊
始維太先生厥德崇隆生膺多福歿亦考終

鳳書丹詔久頒廊廟後禊光昌先人食報我意悽愴哀
臨未蚤聚窟洲邊孰尋靈草茲陳豆實芳芬有飶
翹首雲輶翩然來格嗚呼尚

鄉食

維

康熙五十五年歲次丙申四月庚寅朔越癸巳日
宜祭之辰年家眷晚生郭鋹偕男耕禮謹以辦香
束帛清酌庶羞之儀致祭於

皇清誥封光祿大夫內閣中書加十二級景翁項老先
生之靈而言曰嘗讀洪範之言五福也先以壽富
康寧即繼以攸好德而後以考終命終焉誠以人
生諸福畢集而苟非見之行事者足以為閭黨之
楷模則識者且有庸庸厚福之譏矣可知人必好
德而所謂壽富康寧者方不愧亦必好德而所謂
考終命者始不誣也如我景翁項老先生則真五

福悉具而克稱爲完人者矣翁壽越古稀席豐履厚且一生遭遇略無欹歎是壽富康寧翁固以一身備之矣然此特人之所以羨翁者耳而吾之所以稱翁則更有進焉今夫人之不朽於世者初不在時之修短也誠得其不朽者而旦暮亦百年也失其不朽者而百年且旦暮矣人之不絀於已者初不在資之贏縮也誠得其不絀者而貧窶亦素封也失其不絀者而素封且貧窶矣且人之求慊於一心者更不在時之安危也誠得其自慊者而瑣尾流離無非從容暇豫也失其自慊者而從容暇豫亦等之瑣尾流離矣誠哉壽富康寧不足爲

好德者重而好德則誠足以重壽富康寧矣况乎天之福善初無或爽又決無好德而不獲壽富康寧之理則壽富康寧不又爲好德者操之左券耶翁生平嘉言懿行指不勝屈其載之家乘而播之鄉人者久已備詳之矣予故不多贅而獨於翁得天之厚爲衆人之所豔稱者知其致此有本且以見翁之所重者在此不在彼而所謂考終命者亦信爲好德之徵又何惑其與壽富康寧備茲五福哉抑吾猶有說焉五福之中未嘗及貴而翁以子貴封如其官則是五福竝貴而爲六矣况乎源遠流長翁一堂備四世芝蘭馥郁不下數十人將來

聯翩而起皆為清廟明堂之器則好德之所留貽者又豈有世數之可限哉夫世之善為挽誅者多為悼惜之詞予獨不以悼惜而以頌禱蓋誠見夫翁之一生誠可為完人實由好德為之基則人之惜翁者皆可轉而為翁慶而世有知言之君子亦決不以予為好諛也夫尚

饗

維

康熙五十五年歲次丙申季冬宜祀之吉庚辰科進士原任陝西延安府甘泉縣知縣行取以各部主事用年家晚學生在制姜朝勳謹以蕪詞俚句致告於

皇清誥封光祿大夫內閣中書加十二級景翁太老先生之靈曰嗚呼地之職載惟其厚也厚則無所不生亦即無所不載倘其積之者不厚則無論物不能生即使生生不已而紛紛蕃變於其中且將虞承之者之傾圮而或潰又胡以容蓄而無遺故一觀於坤厚之載物而恍然於我公之以厚居躬以

厚獲福固同合乎大造之理而不爽已恭惟我公
圭璋令器柱石宏材揆五車二酉之藏而不矜才
於章句行七松五柳之樂而非遜迹於林泉蓋惟
本體至醇故推行極篤今觀公之孝養則厚於事
親友愛則厚於從兄治祠墳則厚於報本贍宗族
則厚於推仁培養師儒則厚及同文之士周給衣
食則厚及行道之人因而身任

國家之鉅艱則厚在急公助理當事之疑難則厚在行
義此天性固然也由此而荀龍謝鳳濟濟堂階則
天厚以令子王槐竇桂森森庭砌則天厚以文孫
壽居福之首而天以期頤厚之富居福之次而天

以豐盈厚之親承

天語親嘗玉食則寵賚何厚特晉崇階特膺

紫誥則尊榮又何厚乎人謂造物之眷我公者何疊厚
如此而不知公之厚德自有以致之蓋積之者厚
故發之者亦無不厚則今日之騎箕尾乘長鯨而
去固不過為列星為河嶽仍備極宇中之樂境耳
豈以羽化形脫為不適哉勲向叨次君之屬吏久
慕門墻近仰至行之芳規彌欽俎豆用敢以厚德
之說為公奠一觴曰坤輿以厚載性量亦如斯清
白追先代恩勤篤本支意深常自下德隱畏人知
壯歲登車蚤高年倚杖遲無憂因子述有穀與孫

詒章服隨

綸綉珍羞逮鼎彝培蘭滋宿蕊種竹起新枝益算齊鵬
運彈冠集鳳池階前方戲綵堂上自含飴正祝長
庚現何虞暮景移停春懷舊澤墮涕遡芳儀容蓄
何貞固敦仁協地維哀哉尚

饗

祭輓彙錄卷二



